

Kinguaassiutitigut atonerluisimasut pineqaatissinneqarnerannut atatillugu, kinguaassiutitigut atonerlueqqinnissaq pinngitsoorniarlugu katsorsarneqartalnissaat siunertarlugu nunatsinni pinerluttulerinermut inatsisip allannguutissaanik saqqummiussisoqarsinnaaqullugu Naalagaaffeqatigiinnermi oqartussaasut saaffigineqarnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.

(Inatsisartuni ilaasortaq Stine Egede, Inuit Ataqatigiit)

Akissuteqaat

(Isumaginninnermut, Ilaqutariinnut Inatsisinillu Atuutsitsinermut Naalakkersuisoq)

Siullermeerneqarnera

Inatsisartuni ilaasortaq Stine Egede, Inuit Ataqatigiinneersoq, aalajangiiffigisassatut siunnersuummik matuminnga saqqummiussaqaarmat Naalakkersuisut qutsavigaat.

Kinguaassiutitigut pinerluuteqarsimasut inissiisarfimmiinnerminni katsorsartinnissamut periarfissaqarnissaat pingaartuummat Naalakkersuisut isumaqatigilluinnarpaat. Kinguaassiutitigut pinerluuteqarsimasunut innarliisimanertik pissutigalugu eqqartuunneqarsimasunut inissiisarfik taamaallaat toqqorsivittut atorneqassanngilaq. Taamaammatt inunnut kinguaassiutitigut kannguttaatsuliornermik pissusilersortartunut tapersersuinissamik katsorsaannissamillu periarfissaqarnissaq Naalakkersuisut kinguaassiutitigut atonerluisarneq akiorniarlugu nuna tamakkerlugu periusissiaanni 2018-2022-imi - Killiliisa-mi - pitsaaliuinnermik suliniutinut ilaavoq. Katsorsarneqarnissamik neqeroorut kannguttaatsuliornermik pissusilersortartunut eqqartuunneqarsimasunut sammititaq Naalakkersuisut sivisuumik kissaatigisimavaat, taamaammallu tamanna Naalakkersuisut Inatsisinik atuutsitsinermut suliassaqaarfimmi periusissatut suliniutissanullu pilersaarutaanni 2017-imeersumi suliniutissat ilaagaat.

Taamaattumik Kalaallit Nunaanni meeqqanut inuusuttunullu isumaginninnikkut aarlerinartorsortunut suliniutit patajaallisaavigineqarnissaat pillugit kalaallit qallunaallu oqartussaasoqarfiisa assigiinngitsunik suliallit akornanni suleqatigiinnermi, inissiisarfinni innuttaasunut ilaalersitseqqinnissaq pillugu suliniutit arlallit innersuussutigineqarsimmata Naalakkersuisut nuannaarutigaat. Nuummi inissiisarfimmi katsorsartittussanut inissanik pilersitsinikkut, kinguaassiutitigut pinerluuteqarsimaneq pissutigalugu eqqartuunneqarsimasunut immikkut piareersakkamik pineqaatissereiaaseq ineriartortinneqarsinnaavoq. Kalaallit Nunaanni kinguaassiutitigut pinerluuteqarsimasut eqqartuunneqarsimasullu pillugit inuit kinaassusaat tunuliaqutaallu pillugit ilisimasanut toqqorsivimmik pilersitsinissamut tunngavissaqalissaq.

Tamatuma saniatigut Kalaallit Nunaanni Pinerluttunik Isumaginnittut Katsorsaanermut Attaveqatigiinnut ilanngunnissaat innersuussutaasunut ilaavoq, tassanilu pikkorissaasarnissat suliallu pillugit siunersueqatigiittarnissaq siunertaapput, tamatumalu saniatigut inissiisarfimmiittunut kinguaassiutitigut pinerluuteqarsimasunut Kalaallit Nunaanni Pinerluttunik Isumaginnittut suliniummik programmimik pilersitsiumaarput.

Kannguttaatsuliornermik pissusilersortartut inissiisarfimmeereernerup kingorna katsorsartinnerisa ingerlaannarnissaat pingaaruteqarpoq. Taamaammatt inunnut inersimasunut

meeqqanut inuusuttunullu 18-it inorlugit ukiulinnut kinguaassiutitigut kannguttaatsuliornermik pissusilersortartunut katsorsaasarfimmik pilersitsisoqarnissaa innersuussutaasuni ilaavoq.

Kinguaassiutitigut atonerluisarnerit pillugit ajortut naaffeqanngitsumik ingerlalersarnerisa unitsinneqarnerannut innersuussutaasut tamakku tamarmik sulinermut tapersersuiffiupput, tamannalu pingaernerpaatut suliassariuassavarput.

Katsorsaasarnerit tarnip pissusaanut tunngammata eqqartuunneqarsimasup pissusilersortarnerminik allangortitsinissaminut piumassuseqarnissaa pisariaqarpoq. Eqqartuunneqarsimasoq peqataanissaminut kajumissuseqanngippat taamatut katsorsarneqarneq sunniuteqarnaviangilaq. Tamanna aamma Danmarkimi parnaarussivinni kannguttaatsuliornermik pissusilersortartut katsorsartittarnerinut periarfissaareersunut naapertuuppoq. Tamatumani Herstedvester Fængsel assersuutaasinnaavoq, tassanimi kinguaassiutitigut pinerluuteqarsimasut eqqartuunneqarsimasut pillaammik atuinertik immikkoortortami innersuussisarfiusumi sivikitsumik sakkortuumillu ingerlatsillutik aallartittarpaat, tassanilu eqimattakkuutaarluni kajumilersitsinissaq pillugu ingerlatsinermi pinngitsoorani peqataasarnissaq piumasaqaataavoq. Nammineq ajornartorsiutigisanut paasisaqarnerunissaq, inissiisarfirmiinnerullu nalaani kinguaassiutit atortarnerat pillugit nappaatit pillugit katsorsartinnissamut kajumilersitsinissaq anguniagaapput. Tamatuma kingorna inissiisarfirmiittup tarnikkut nappaatit pillugit aamma kinguaassiutit atortarnerat pillugit nappaatit pillugit qanoq katsorsarneqarsinnaanersoq naliliiffigineqartarpoq.

Innuttaasunut ilaalerseqqititsiniarluni katsorsaasarnermut aamma aalajangiiffigisassatut siunnersuummi eqqarsaataasumut Naalakkersuisut taamaalillutik isumaqataapput, isumaqarlutilli neqeroorutit Herstedvester Fængselimi nassaassaasut assigalugit inissiisarfirmiinnerup nalaani katsorsartinnissamut neqeroorutit matumani pineqassasut. Tamanna Naalakkersuisut isumaat malillugu kissaatigineqartutut sunniuteqarnerussasoq.

Naalakkersuisut taamatut oqaaseqarlutik allannguutissatut siunnersuut manna saqqummiuppaat:

“Inuit kinguaassiutitigut atonerluisimaneq pissutigalugu inissiisarfirmiittussanngorlugit eqqartuunneqarsimasut, atonerlueqqinnginnissaat anguniarlugu inissiisarfirmiinnerminnut atatillugu, innuttaasunut ilaalersinneqarnissaq qulakkeerniarlugu katsorsarneqarnissaat kajumissaarneqarnissaallu pillugit naalakkersuisut naalagaaffeqatigiinnermi oqartussanut saaffiginnissuteqarnissaannik peqquneqassasut.”